

【 僱行過个一條山路 】黃火盛原作

記得僱略略仔知人我¹个時節，有一擺阿公摻阿爸講，想愛去仙山掙仙水，該當時僱想：仙山怕係戴當多神仙，該兜神仙逐日食个水，就怕係安到仙水，食了²仙水會像神仙樣無愁無慮，日日就做得樂線³樂線。

過幾日天吉光，阿公七早八早就趺床，喊阿爸載佢去掙仙水，僱摻阿爸講僱乜想愛去，阿爸講做毋得，阿公顛倒講毋怕，分佢跔，係講半路打頓屈⁴毋行，轉來皮斯愛弓較纏兜⁵，僱摻阿公打賭講絕對毋會。就恁樣僱跔阿公坐等阿爸个車仔出發去仙山。上車無幾久，僱目珠眨等一下仔就睡忒，等到阿爸喊僱，車仔已經來到仙山腳下了⁶。阿爸講著加一領衫，朝晨頭清冷清冷毋好冷著，僱衫加啊等，一下車就走當遽，阿公大嫲牯聲喊僱毋好走恁遽，一來驚僱毋堵好會墮倒，二來等一下上崎毋得半崎坐，所以僱就乖乖跔佢兩儕定定仔行。

¹ 知人我：音 di` ngin ngo`；懂事。

² 了：音 liau`；完畢、結束。

³ 樂線：音 log` sien`；悠哉、樂天。

⁴ 打頓屈：音 da` dun` kud`；耍賴皮，鬧彆扭，停頓不前。

⁵ 皮愛弓較纏兜：音 pi oi` giung` ha` hen deu`；皮要繃緊一些。

⁶ 表完成的語尾助詞。海陸腔有 le`、lio`.....等不同讀音，讀者可依文章情境，自由詮釋發揮。以下同此注釋說明。

蹶到半山排，腳當軟，歸身汗流脈落，遠遠看著一隻涼亭，僱就煞煞走去坐在該石凳頂，風輕輕吹來，心肝肚偷想愛打潑賴⁷，斯緊故大氣摻阿爸講無想再過行了。阿爸就講：「喊你毋好來，你偏偏恁愛跔，這下愛仰結煞正好。」阿公接嘴講：「神仙打鼓有時錯，腳步踏差麼人無，應著你來打毋著算了。」

聽著阿公恁樣講，僱高不而將又繼續行，毋過這下行無恁遽了！翻轉頭，看著無幾遠有一對阿爸、阿姆牽等一個比僱還較細个細阿妹仔，佢兜定定仔一步步行上來，像會追著僱這兜了，阿爸就趕這機會講龜仔摻兔仔走追仔个古，害僱聽到面紅濟炸⁸當見笑，僱連該細阿妹仔就比毋得！蹶呀蹶仔總算到嶺頂最高點了，群山眾嶺盡在眼前，耳空聽著竹雞仔、山阿鵲這兜鳥仔个叫聲，鼻空鼻著夜合花个清香，心情突然間嘩開起來。該時節雖然無看著麼个大羅神仙，毋過僱也試著比看著神仙還較歡喜，因為這斯像發夢⁹樣；阿爸牽等阿公去張¹⁰仙水，七張一細罐愛僱搯等轉屋下，僱問阿爸這仙水摻屋下个水道水有麼个無共樣？佢講來到這位張水个心情摻屋下張水道水个心情係無共樣哦。

到這下來，僱正知頭擺人講个：「路毋行，草生塞；心毋開，會打結。」來到這方所在¹¹，保證心肝嘩嘩開。

⁷ 打潑賴：音 da` pad lai+；耍賴皮，使性子，耍脾氣。

⁸ 面紅濟炸：音 mien` fung zi` za`；臉紅耳赤。

⁹ 發夢：音 bod mung+；做夢。

¹⁰ 張：音 zhong`；盛。

¹¹ 這方所在：音 lia` vong` so` cai+；這個地方。